

Ene énnée éd brin

Boène énnée qu'o disoit au premii éd janvieu 2000, in soufflant din chés tchots serpentins qu'is déroul't d'chés capieux pointus pis qui foét't d'él trompette. Attendi ch'temps lo un ein-mi qu'o n'voèt po évnir, sournouos pis qui s'est érferdri in Chine i cminchoait à foaire coeuser d'li à l'muche tin pot, seulemint on n'él lo point ébruité. Un virus, un covid cousin d'él grippe deux foè érien, jugé pos gravemint daingereux au cminchemint, meume par chès grainds cérusiens, quainte i l'in o dèfini par s'inrachiner in Europe pis din nos pouéyis.

Ch'est quainte os avons vu in Chine des villes, qu'is sont toujours plengne éd vidjeur comme des froumières, qu'is ont tté confinées pis qu'o n'voéyez pus person-ne din chès rues, o n'os sonmes rindu compte qui s'passoit quite coeuse éd point conforme. Si tant point conforme qu'un tchot virus vrimeux i vo canger él face du mon-ne in quique moés in dévnant ène pandémie. Bien éq chès Chinois is n'os euche meinti in rapiotant largémint él invenure, in déclatçant un séquant d'milles éd doreux, in févrieu os in étoinmes à chonq ou six fouè d'pus avu déjo ène tralée éd gins définctès.

Vlo ch'est comme neu qu'él tchinze éd mars confinemint général comme tertous chès poéyis vogins. Quasi toute l'existence artée, pus d'bsongne pus d'école, él majorité d'chés boutiques freumèes, foque él drouot d'és dessatcher pour s'alimenter avu un muche musieu dsus s'brogne quainte os in avoème. (i n'étoait pos obligatoère pasqué chès stocks i n'avoait'té point été érnouvelés.) Pèr bonheur chès blancs bonnets al z'in ont foué in étoffe, pis à m'zure des espèce éd rouillère pour chès cérusiens qui n'avoait't érien pour s'défènne de chl'affliction. El moind'e déplachemint i d'voait éte acondui d'un papii pour déclatcher à doû qu'os allons pis à tchelle heure. Achteure in pus de ch'muche musieu i feut s'aproprier ses mains à chaque portes avu un tchot flacon qui aspèrge un molé d'alcool avu du savlon quainte o appouéye d'sus.

Deux moès comme neu pis l'moumint du déconfinemint il o v'nu. Avu chès bieux jours pis l'caleur ch'virus i s'est confiné à sin tour, i s'est mis in varingue mais in plache éd chès ors pis d'chés mérmottes li i l'o foait cho quainte éch solé i l'est ch'pus dru. A ch'momint lo chès gins is'sont mis à crouère éq chtoait fini, portant chès grainds connaisseux i sintoait't déjo él deusième vague.

El mérée al o vnue comme i l'avoait't déclatché... Pis l'vague à l'o té pus rouède que l'preume qu'al avoait qua meume foait pus éd trinte mille éd défunctés. To qu'ch'est o deusième confinemint, mais ch'coeur lo él bsongne pis l'école is ont poursui, cho avoait coûté bieu-sou él preume foé. Ch'est lo qu'os avons compreind qu'os avoème affoère à ène maladie à crier misère, pis d'él décarsure qui s'abaloait dsus nos eutes.

Pus d'existence humaine n'pus vir ses gins, frères, sœurs, anmis pis zz'eutes, n'pus povoér boésier ses nazeux et tchots moucrons, s'démefier éd tout l'monne, ène vie d'zombie avu un r'sintimint d'trouille. El deusième vague al est po finite qu'o jallate d'ène trouosième apreû noël avu un virus qui l'o cangé in Engleterre pis in Afrique du sud, tchelle mouise, tchelle avanie ! I gna un vaccin qui l'évenin mais i n'adiminch'ro pos tout, i vo faloèr foaire avu pour lonmint.

O dit qu'èch virus i l'est vnu d'un Pingolin labo in Chine, dusque lo tchèche qu'avoait intindu bérldler èd Pingolin ? Os s'avons mi à quoé qu'al érsianne él bestiole lo, adon os i ont foait supporté

l'feute , mais al n'y est pour érien, ch'est chès gins qui sont drière él pindémie, mais o l'séro ti un jour ? Mais chan qu'o séro bérade ch'est l'mau que ch'meutit virus i l'éro foait.

Apreu tout chlo quainte él évenure al finiro par s'rapurer èl position ché s'ro ène affliction sans édvancement. El débeuche in heuche comme neu o ne l'avoait jamouais vu, chès restaurants, chès bars, chès tchots hommes d'éto qui n'sin rinvétiront pos, ch'pus pire i s'rot à évenir pour él mitant éd 2021. Ene mouise d'infér al vo s'ablotcher dsus l'monne, surtout dus chès laséres pis pour lonmint. Déjo achteur chès étudiants qui foésai't des tchots écances din dz'estaminets pis amon Mac do, obin d'zeutes qui sont déjo assujeti à chès resto du tchoeur. Coèr bien qui gna des donnants qui peut'té abouler un molé d'éyude à chès chuchoux d'peuches.

Bien éq ché fuche déjo po adité comme fléyeu, si i gn'avoait yeu qu'él pindémie in 2020 pis qu'al s'seuche ar'tè avu l'énnee, (mais ch'virus i n'o mi foait éd diférinche avu l'tcheue pis l'intrée éd l'énnee) os éroinme érfri avoèr un molé d'érepos. Mais nan i gna eu chès barbusiers qui s'sont surpassés.

El troès éd janvieu un hocleu i l'attatche des passants avu un coutieu din un pèrc à Vllejuif, un eut avu un coutieu étou él quate avri à Roman sur isère. El vangt chonq séctème à Paris un eut désailé i s'in prènne à des gins avu un hachoir éd chertutcheu ch'coep lo. Ej vos éd-manne un molé quoé qu'ch'est-qu'ch'est que l'vériure qui n'os à foait chl'étron d'glaine lo, i s'crouo à Halloween ou d'in Scream !

El vangt neu d'octobe ène attatche toujours au coutieu d'in ène édjlise à Nice, i gna pus éd limite arien, mais lo chn'est po l'oeuvre éd chès débistriques islamiste. Qua meume à chaque fouos l'chambutchage i l'est oussi ardent qu'incompréhinsibe in laissant des périntès din l'décarsure pis l'pangne, surtout quainte i gna troès ames d'éscofiées.

Din tout ch'lo ché-té chl'assazin à l'apoé d'éch collége éd Conflans St Honorine par un exalté qui l'o l'pus mértcher chès gins. Rapinsez un molé écmint qu'o put déhacher él tchuète d'un professeur avu un coutieu, pach'qui lo dvisé d'un dessin ! Feut ti éte inchépé d'chervelle pour crouère qu'un diu i vo cmande éd foère ène coeuse oussi abominabe qu'arvleuse. I y-én éro ti ène fin à dz'estupidités pérées ?

Pis pour freumer ch'festival él tchinze éd juhiet chès Corses, por qu'os ramiteuve d'eusses, qu'is foet't esploser ène bombe aliconte d'ène jondarmerie. Mais lo pas d'afolés ni d'définctès ni dommages, is ont volu simplémint qu'os seuchonches tertous qui feut toujours s'attène à ène écécissure éd leu compte.

Adon os povons déclatcher qu'chol énnée éd brin al à yeu sin lot d'adversités pis d'surprises, pessé qu'nan, i falait s'agimoler d'él météo avu sin méchant temps oussi mawais éq vrimeux. Os sommes adité éd vir chès rivières qui débatach't apreu un ernu un molé pus grou in inyeuant des gronnées d'mouaisons, l'ieu al s'in vo i feut nettier pis racafader tou t chan qui l'o tté berzillé.

Chan qui l'o druger dsus chès Alpes din un villache qui n'a po él moin-ne tchot couillou n'os ébeubi, pis n'os foait ouvrir des zius commo des boudaines d'agaches si tant qu'cho sanne po réel. Chan qui l'o déchindu d'él montanne chl'o érpasse él comprintichouér. Un invahichemint d'ène péré raquerie pis d'cailleux qui l'o in-mné él mouétii d'éch villache, chès moésons importées comme des catieux d'cartes, quique fouos avu chès gins d'din, chès cauchées évintrées, chès ponts démanglés,

déwérwignés, étreumés din l'badrée. Meume éch camp d'soèle i l'o té défustiné, des pierres tombales comme des luzets imbertchés avu chès beus, qué l'âme éd grâce pour chès périntès. Qui i l'éroét pu prévouèr ène affliction comme échlo ? Ech bilan humain i l'est por seur gramint pzant comme pour tortous chès phunomein-ne éstraordinaires.

Attendi ch'temps lo din ch'reste du monne chès fus éd fouéreur i n'ont jomouais tté si ardent qu'in Amèrique pis qu'au Brésil in eingloutichant des milles d'vérgues d'apes ragalis in chène. Tchelle tralée éd CO2 qu'al a tté éperlindjée din l'air, in pus chès apes escandis i n'poront pus in a't'nir éd CO2 ch'qui foait qu'os érons coèr pus éd mateté à v'nir.

Rindu à ène posture oussi caterneuse os érons pu s'fidjurer qu'él politique al vo ramissé chès poéyis pour abouénir l'existence in général. Coèr un coeup qué mécompte !

L'éthilibe du monne i l'est d'pus in pus casvele, surtout quainte o voét l'eut rétotchet d'Trump margré ène débac à ch'votache qui n'vu po s'in-r'naller d'él 'maison blanche', tout in infenouillant ses partisans. Invahir éch Capitole ch'est ti pinsabe, ch'est quasi ène révolution, ène djère civil, i gn'avoait des castafioles avu des fusis din chès rues, por seur qui n'feut peu d'coeuses pour éq cho ésplose. Infin i n'vo pus inchpé l'monne lonmint pis i n'poro pus s'éjouer avu sin copain de Corée à chti qui l'o ch'pus grou 'bouton nucléaire'. Ejous pinsabe qu'un gouvernant d'un graint pouéyis i peuche s'aconduire à s'mode sains personne pour l'érténir, quoéqu'cho nn-est qu'cho d'été oussi tourlipin-ne pis èn n'avouèr eune rude satchie?

I gna la Turquie qui vut pétcher du pétrole pis du gaz din l'mér éq ch'est l'ieu éd la Grèce, pis comme él Grèce al n'o po ène grossieuse forche militaire, ch'est un btieu à nos qui l'o tté s'foaire vir la ba pour éq chès Turcs is s'in ratorn't à leu casba. Tout ch'lo ch'est des diférints qui n'in définiss't po d'ampinés pis de s'boursoufflés, seurtoute apreus qu'éch présidin d'chès Turcs i lo déclatché qu'él note éd Présidint i l'est langreu de s'tchuète pis qui foéroét bien d'él sogner. Por seur vlo lo un parlache diplomatique pour rapager pis radouchir chès postures doreuses.

Quainte o n'a érbéyé par drière dsus chl'année qu'o évenin d'vif os avons pus qu'à touillander insanne tout chan qu'os avons vétchu pis ch'lo n'os foait ène belle année éd brin comme o n'éroèt jamouais pu s'fidjuré qu'al peuche avoèr existée !

Ed quoè i s'sro foait 2021 ? Amérrons llé lo, po d'débac édvant l'heure, pis slon l'esprèssion d'circonstance, Boène année... !

agimolé accommodé

chuchéus d'peus démunis (être)

couillou ruisseau

druger arroser (abondamment de pluie)

écance boulot, travail

érferdri développé, qui a grandi

éte à l'âme éd grâce être dans la misère

éto (homme d') artisan, manuel

mateté chaleur étouffante

ouvrir des zius comme des boudaines d'agaches écarquillé les yeux

pessé qu'nan bien sûr que non

tourlipin-ne individu irréfléchi

varingue sieste, hibernation